

**«ՍԱՍՆԱ ԾՌԵՐԻ» ԵՐԵՔ ԵՂԲԱՏՐՆԵՐԸ ԵՎ ՆՐԱՆՑ
ՎԻՊԱՍԱՆԱԿԱՆ ԶՈՒԳԱՀԵՌՆԵՐԸ**

Ս. Գ. ՊԵՏՐՈՍՅԱՆ

Մհեր, Հովան. Վերգո եղբայրները «Սասնա Ծռերի» այն կերպարներից են, որոնք էպոսում պարզ դրսևորում են իրենց տիեզերական էությունը: Վաղուց է նկատված, որ նրանցից առաջինը՝ Մհերը, պահել է իր դիցաբանական նախատիպի՝ լույս-արևի աստված Միհրի անունն ու բնորոշ հատկանիշները¹: Հ. Օրբելին նրա մեջ տեսնում էր նաև նախնական որսորդին և նիզակակիր մարտիկին՝ կայծակն անձնավորող տիեզերական շանթառաք էակի էպոսային կրկնորդին: Այս երկրորդ էությունը Մհերը անքակտելի կապի մեջ է իր եղբայրների հետ, որոնք նույնպես պահել են իրենց դիցաբանական նախատիպ ամպրոպային էակների հատկանիշները: Ըստ Հ. Օրբելու, Ձենով Հովանն իր ղղրդացնող ու սասանող ձայնով հիշեցնում է որոտի անձնավորում՝ երկնաբնակ դարբնին (վերջինիս նման մետեորային երկաթից սուր է կռում), իսկ Վերգոն վերհուշն է տիեզերական այն էակի, որն անձնավորում է կայծակի ու որոտի հետ սերտորեն կապված և նրանց հաջորդող անձրևային երևույթը (այստեղից էլ, ըստ Հ. Օրբելու, նրա հայտնի մականունը)²:

Մեր վիպական եռյակի դիցաբանական նախատիպերը ստեղծվել են խոր հնադարում, հնդեվրոպական ցեղերի համատեղ բնակության ժամանակաշրջանում: Ըստ ֆրանսիացի գիտնական Ժորժ Դյումեզիլի, հին Իրանի և Հնդկաստանի հասարակության հուսման սկզբունքը դալիս էր հնդեվրոպական միասնության ժամանակաշրջանից, երբ հնդեվրոպացիներն ընդհանուր լեզվի հետ միասին ունեին իրենց հասարակության սոցիալական կառուցվածքին համապատասխանող ընդհանուր գաղափարախոսություն: Միասնության ժամանակաշրջանի հասարակության հուսման բաժանմանը (քրմեր, զինվորներ, հողագործներ կամ շարքային համայնականներ) համապատասխանում էր նրանով պայմանավորված աստվածների եռանդամ դասակարգումը: Ընդ որում, ինչպես ապացուցում է նա, հնդեվրոպական ցեղերի գիցական եռյակներն օժտված էին ոչ միայն տիեզերական, այլև սոցիալական ֆունկցիաներով: Նրանց առաջին անդամը դրսևորվում էր երկու բնությամբ՝ մոգական և իրավական, տնօրինելով քրմերի գործունեության ոլորտը կազմող երևույթները: Երկրորդ անդամը հանդես էր գալիս որպես երկնային զորավար և հովանավորն էր զինվորականության ու ռազմական գործի: Դիցական եռյակի երրորդ

¹ Կ. Մելիք-Օհանյան, Միթրա-Միհրի արքայականներն ու գործակալները («Գրական-բանասիրական հետախուզումներ», գիրք Ա, Երևան, 1946, էջ 269—327):

² Հ. Օրբելի, Հայկական հերոսական էպոսը, «Սասունցի Դավիթ», Երևան, 1961, էջ 21—22:

անգամը մարմնավորում էր բերրիությունը և հանդես գալիս առաջին հողագործի ու հողագործության հովանավոր աստծու դերում³:

Վերգո, Մհեր, Հովան հղբայրների կերպարներում պահպանվել են նրանց դիցաբանական նախատիպերի ոչ միայն տիեզերական, այլև սոցիալական ֆունկցիաների վերհուշերը: Վերջիններիս բնույթը պարզելու համար դիմենք այս տեսանկյունից մեր վիպական եռյակի զուգահեռներ հանդիսացող և նույնպես ժողովրդական բանահյուսությունից եկող հին իրանական և հին հայկական համապատասխան կերպարներին, որոնց ստեղծման գործում որոշիչ դեր են խաղացել ինչպես աստվածների դասակարգման եռանդամ սիստեմը, այնպես էլ հասարակության եռադաս բաժանման նրան ծնած գաղափարը:

Հայտնի է, որ դասալիկ բաժանման և պետական կառավարման սիստեմները հին Հայաստանում և հին իրանում սերտ կապի մեջ էին: Հին իրանական հասարակության մեջ տեսականորեն գոյություն ունեին արտոնյալ երեք դասեր՝ քրմեր, զինվորականներ և հողագործներ⁴: Սրանց առաջացումը իրանական ավանդությունները կապում էին զրադաշտականության հիմնադիր Զրադաշտի՝ ռադին քրմի, առաջին զինվորի և առաջին հողագործի՝ ու նրա երեք որդիների հետ: Զրադաշտի ավագ որդուց (քուրմ եղբորից) սերված էր համարվում քրմությունը, երկրորդ որդուց (զինվոր եղբորից)՝ զինվորականությունը, երրորդից (հողագործ եղբորից)՝ հողագործ գյուղացիությունը⁵: Դարերի խորքից եկած այս ավանդական տեսակետը այնքան կենսունակ էր, որ անգամ V դ. պարսից մեծ հազարապետ Միհր-Ներսեսը իր որդիներին կրթել ու դաստիարակել էր նրա հետևություններ: Նրանցից մեկին նա պատրաստել էր որպես ապագա քուրմ և օրենսդիր, մյուսին՝ ռադական վարչության պետ (arāteštārān-salar), երրորդին՝ «հողագործների պետ» (vāstryōšan-salar)⁶: Իհարկե, այս տեսական դասակարգումը չէր համապատասխանում V դ. պարսկական իրականության մեջ գոյություն ունեցող դասերին և դասակարգերին: Սակայն այն դեռևս կիրառվում էր՝ իրեն զգացնել տալով հատկապես կրոնի հետ առնչվող հարցերում: Այսպես, օրինակ, իրանի զրադաշտական ատրուշաններից զինավորներն էին Ֆարնբազը, Գուշնասպը և Բուրդեն Միհրը: Դրանցից առաջինը քրմական դասի ամենահարգված անդամներն էր, երկրորդը՝ զինվորականության, երրորդը՝ հողագործների և արհեստավորների համար⁷:

Հին Հնդկաստանում գոյություն ունեի հասարակության բաժանում առանձին ներփակ սոցիալական խմբերի՝ վարնաների: Ըստ Ռիգվեդայի դրանք առաջացել էին Պուրուշի-արարչի մարմնի տարբեր մասերից: Բրահմանների (քրմեր) վարնան. առաջացել էր նրա բերանից, կշատրիներինը (զինվորներ)՝ ձեռքերից, վայշյաններինը (հողագործներ, արհեստավորներ,

³ G. Dumézil, La préhistoire indo-iranienne des castes. „Journal Asiatique“, 1930, t. 216, pp. 114–124; Les dieux des indo-européens, Paris, 1952, p. 5.

⁴ Ավետայի ոտանավորներից մեկում (Ավեստա, Յաշտ, XIX, 7) ասվում է. «Ինչպես ասվեց, նրանք (եռները) գոյություն ունեն (որպեսզի) ոտնատեղի լինեն քրմերի, զինվորների, հողագործների համար» (H. Bailey. Zoroastrian problems, Oxford, 1943, p. 18):

⁵ W. Geiger, Ostiranische Kultur im Altertum, Erlangen, 1882, S. 483.

⁶ Н. В. Пугулевская, Византия и Иран на рубеже VI и VII веков, М.—Л., 1946, стр. 207.

⁷ Ричард Фрай, Наследие Ирана, М., 1972, стр. 325.

առևտրականները՝ սրունքներից, շուգրանների (իրավազուրկներ)՝ ներքաններից, Վարնաների քառաստիճան այս սխտեմը (չատուրվարնյա) տարածվում էր նաև երկնային էակների վրա։ Մահաբարատան հնդկական աստվածներին դասակարգում է հետևյալ կերպ։ Անգիրասների խմբի աստվածները կազմում էին բրահմանների երկնային վարնան, Ադատյաններին՝ կշատրինների, Մարուտներին՝ վայշյանների, իսկ Աշվիններին՝ շուգրանների⁸։ Վարնաների քառաստիճան սխտեմը ստեղծվել է դասակարգային հասարակության առաջացմանը զուգընթաց, երբ տոհմային ավագանին ամրապնդում էր իր դիրքերը՝ ի հաշիվ նվաճված ցեղերի և ստրկացված համայնականների (հենց սրանցից էր բաղկացած շուգրանների իրավազուրկ վարնան)։ Չատուրվարնյայից առաջ հին հնդկական իրականության մեջ ընդունված է եղել հասարակության եռադաս բաժանումը՝ բրահմաններ, կշատրիններ և վայշյաններ։ Այս առումով ուշագրավ է, որ հնդկներն այժմ էլ այս երեք վարնաներն համարելով արտոնյալ, նրանց ներկայացուցիչներին կոչում են «կրկնածին» (դվիշա)⁹։

Ինչպես հայտնի է, Խորենացին իր «Հայոց պատմությունը» կերտելիս, գրավոր և դրական մշակման ենթարկված բանավոր աղբյուրներից բացի, ուղղակիորեն օգտվել է նաև ժողովրդական բանահյուսությունից։ Վերջինիս մեջ կարևոր տեղ ունի վիպասանքը։ Խորենացու մշակմամբ (կամ ինչպես ինքն է ասում՝ «ճշմարտամբ») մեզ է հասել Արտաշես արքայի և նրա երեք որդիների՝ Արտավազդի, Վրույրի և Մաթանի մասին վիպասանքից եկող մի առասպելավանդադրույց, որը պետք է ձևավորված համարել մեր նախնիների կողմից ժամանակին կիրառած աստվածների եռանդամ դասակարգման և նրան ծնած հասարակության եռադաս բաժանման սկզբունքի ազդեցության տակ։

Հիշվածների հետ միասին Խորենացին Արտաշեսի որդիների շարքն է դասում նաև Տիրանին (կամ Տիգրանին) ու Զարեհին¹⁰։ Հ. Մանանդյանը, ելնելով նրա հաղորդումների և օտար ու հայկական ուրիշ աղբյուրների ընձևած տեղեկությունների համադրումից, պարզել է, որ պատմական Արտաշես Ա-ի (189—160 թթ. մ. թ. ա.) որդիներն են միայն Արտավազդը, Տիրան-Տիգրանը և Զարեհը¹¹։ Գ. Սարգսյանն ավելացնում է, որ վիպասանքից են գալիս և առասպելական են Արտավազդը, Վրույրը, Մաթանը։ Արտավազդի առկայությունը Արտաշեսի որդիների թե՛ պատմական և թե՛ առասպելական խմբերում կասկածից վեր է և պետք է հիմք ծառայած լինի Խորենացուն՝ Արտաշեսի որդիների մասին եղած տարբեր տեղեկությունները միավորելու համար¹²։

⁸ Г. А. Кошелевко, Ранние этапы развития культа Мифры («Древний Восток и Античный мир», М., 1972, стр. 82).

⁹ Н. Р. Гусева, Религиозная обрядность в жизни индусской семьи («Мифология и верования народов Восточной и Южной Азии», М., 1973, стр. 65).

¹⁰ Մ Մ Ս ի ս ի Խ ո Ր Ե Ն ա ց ի ո յ Պատմության Հայոց, Տիգրիս, 1913, էջ 183—184, 201։

¹¹ Հ. Մանանդյան, Քննական տեսություն հայ ժողովրդի պատմության, հ. Ա, Երևան, 1944, էջ 131—135։

¹² Գ. Խ. Սարգսյան, Հելլենիստական դարաշրջանի Հայաստանը և Մովսես Խորենացին, Երևան, 1966, էջ 162—165։

Խորենացին վիպասանքի հետևությունները գրում է, թե Արտաշես արքան իր որդի Արտավազդին է տալիս «զիշխանութին զօրացն ամենեցուն: Եւ նախանձ բերելով ընդ նմա եզրացն ի գրգռութենէ կանանց իւրեանց. վասն որոյ կարգէ Արտաշէս զՎրոյր՝ հազարապետ, զայր իմաստուն եւ բանաստեղծ, եւ հաւատայ ի նա զամենայն զօրծս տանն արքունի. եւ զՄաժան կարգէ քրմապետ ի յԱնի դիցն Արամազդայ: Բաժանէ Արտաշէս եւ զիշխանութիւն զօրուն ընդ շորս. զարեւելեան զօրն թողու ի վերայ Արտաւազդայ, եւ զարեւմտեանն տայ Տիրանայ, զհարավայինն ի Սմբատ հաւատայ եւ զհիւսիսայինն ի Զարեհ»¹³:

Բերված հատվածի ընդգծված մասի աղբյուրը վիպասանքն է, մյուսը իր՝ Խորենացու հավելումը, Այս առթիվ Գ. Սարգսյանը գրում է. «Վերջին հաղորդումը՝ զորքի իշխանությունը շորս մասի բաժանելու և եղբայրներին ու Սրմբատին հանձնարարելու մասին առասպելին չի պատկանում թեկուզ այն պատճառով, որ զորքը շորս մասի բաժանելու գաղափարն սկսվում է արժարծվել դեռևս Վաղարշակի գործունեությունը վերաբերող գլուխներում, իսկ այստեղ տեսնում ենք նրա զարգացման սոսկ հերթական փուլը: Ակներևաբար այս դրվագը արհեստականորեն բարդված է Վրույրին ու Մաժանին վերաբերող այն նախորդ դրվագի վրա, որի մեջ նրանք ստանալով մեկը հազարապետություն, մյուսը՝ քրմապետություն, հավասարվում են Արտավազդին, և եղբայրների նախանձը փարատելու խնդիրը լուծվում է»¹⁴:

Արտաշեսի և նրա Մաժան, Արտավազդ, Վրույր որդիների մասին պատմված ավանդազրույցը հայկական զուգահեռն է Զրադաշտի («առաջին քրմի, առաջին զինվորի և առաջին հողագործի») ու նրա երեք որդիների մասին իրանական ավանդազրույցի: Ինչպես տեսանք, համաձայն վերջինիս, իրանական հասարակության երեք դասերը՝ քրմությունը, զինվորականությունը և հողագործների դասակարգը սերում էին այս երեք եղբայրներից. քրմը եղբորից՝ քրմությունը, զինվորից՝ զինվորականությունը, հողագործից՝ հողագործ գյուղացիությունը: Ըստ այսմ, Արտաշեսի երեք որդիները Հայաստանում, ինչպես Զրադաշտինը Իրանում, համարվելու էին. առաջինը քրմապետ (և քրմական դասի հիմնադիր), երկրորդը՝ զորավար (և զինվորական դասի հիմնադիր), երրորդը՝ հազարապետ (և հողագործ գյուղացիության դասակարգի հիմնադիր): Վերջին դեպքում պետք է հաշվի առնել, որ հին Հայաստանում հազարապետի իրավասությանն էին ենթակա երկրի բոլոր գյուղական համայնքները, նա էր միաժամանակ տնօրինում ֆինանսների, հարկահանության և հանրային աշխատանքների հետ կապված հարցերը¹⁵: Իրանում հարկահանության շրջանում հանձնարարված էր վաստրյոշան-նալարին, որի պաշտոնի «հողագործների պետ» անվանումը պերճախոս վկայությունն է երկրի գյուղական բնակչության նկատմամբ նրա նախապես ունեցած այնպիսի դիրքի, ինչպիսին Վազ միշնադարյան Հայաստանում ունեցր հազարապետը¹⁶:

Մաժան, Արտավազդ, Վրույր եղբայրներին կերպարներում պահպանված են դրանց նախատիպերի ոչ միայն սոցիալական ֆունկցիաների վերհուշեն-

¹³ Մ Վ Ս Ե Ս Խ Ո Ր Ե Ն Ա Յ Ի, էջ 183—184 (ընդգծումը մերն է—Ս. Պ.):

¹⁴ Գ. Ս. Սարգսյան, նշվ. աշխ., էջ 162—163:

¹⁵ «Հայ ժողովրդի պատմություն», հ. I, Երևան, 1971, էջ 831:

¹⁶ Н. А. Д о н и ц, Армения в эпоху Юстиниана, Ереван, 1971, стр. 446.

րը, այլև դիցաբանական դժերը: Նրանցից ավագը՝ Մաժանը, պահել է իր դիցաբանական նախատիպի թե՛ անունը (այսպես էր կոչվում նաև փոքրասիական աստվածներից մեկը), և թե՛ ամպրոպային հատկանիշները՝ հատկապես ակնառու վիշապազույնների հայր Արգավանի հետ ունեցած հակամարտության դրվագում¹⁷: Եղբայրներից երկրորդի՝ Արտավազդի, կերպարը բարձրանում է լույս-արևի աստված Միհրի հայկական տարբերակի վրա, ուստի և նրա շուրջ հյուսված առասպելներն ու ավանդազրույցները ներկայացնում են Միհր աստծու մասին եղած դրանց զուգահեռները¹⁸: Ինչ վերաբերում է եղբայրներից կրտսերին՝ Վրույրին, ապա խորհնացու երկում միայն մեկ անդամ, հարևանցիորեն հիշվելու պատճառով¹⁹ նա ի հայտ չի բերում վիպասանքում ունեցած իր դիցաբանական գծերը: Այսուհանդերձ, Վրույրի հազարապետի պաշտոնը հողագործների դասակարգի հետ ունեցած առնչությամբ հուշում է, որ նրա դիցաբանական նախատիպը եղել է հեթանոս հայերի հողագործության հովանավոր աստվածը:

Սասունցի եղբայրների սոցիալական ֆունկցիաները պարզաբանելու համար, նախ տեսնենք, թե ինչ հարաբերության մեջ են մի կողմից Մհեր, Հովան, Վերգո, մյուս կողմից՝ Արտավազդ, Վրույր, Մաժան եռյակները: Մհեր-Արտավազդ զուգահեռ կերպարները բարձրանում են միևնույն դիցաբանական հիմքի վրա: Ինչպես ասվեց, դա Միհր (Միթրա) աստվածն է: Վաղուց են ուշադրության արժանացել նաև Միհր-Մհերի և Արտավազդի առասպելների ընդհանրությունները (հատկապես նրանց բնավորությունների երկվությունը, քարայրում փակվելը, երկրորդ գալստի ակնկալիքը)²⁰: Վիպասանքում Արտավազդը հանդես է գալիս որպես զորավար, մի դեր, որ սասունցի եղբայրներից ստանձնել է Մհերը: Հիշենք նաև նրա դիցաբանական նախատիպ Միհր-Միթրայի և Վերջինիս արևմտյան տարբերակ Քևնպարտելի արևի՞ (Sol Invictus) ռազմական գծերը²¹:

Ջուգահեռ կերպարներ են նաև Հովանն ու Վրույրը: Հովանը Սասնա գանձարանի և հարկահավաքման գործի հսկիչի դերով մոտենում է հազարապետ Վրույրին, որի գործակալությունն էր տնօրինում երկրի ֆինանսների և հարկահանության հետ կապված հարցերը: Բացի դրանից, խորհնացին՝ վիպասանքի հետևություններ, Վրույրին բնութագրում է «խմաստուն և բանաստեղծ» բառերով, իսկ այդպիսի գծերով «Սասնա ծռերում» օժտված է ամենից առաջ Հովանի կերպարը:

Որոշակի ընդհանրություններ են ի հայտ բերում նաև Վերգոյի և Մաժանի կերպարները: Մաժանը քրմապետ էր, ուստի և նա էր լինելու եղբայրնե-

17 Մ ո Վ ս ե ս խ ո Ր Ե Ն ա Յ ի, էջ 180, 201—202: Гр. Капанцян, Историко-лингвистические работы, Ереван, 1956, стр. 282—290. Ս. Պ ե տ Ր ո ս յ ա ն, Մաժան-Արտավազ հակամարտության մասին («Սովետական գրականություն», 1971, № 9, էջ 119—120):

18 Թ. Ա Վ դ ա լ Ր Ե դ յ ա ն, Հայագիտական հետազոտություններ, Երևան, 1969, էջ 36—41:

19 Մ ո Վ ս ե ս խ ո Ր Ե Ն ա Յ ի, էջ 183—184:

20 Ս. Ա Ր Ե դ յ ա ն, Երկեր, հ. Ա, Երևան, 1966, էջ 148—151, 426, Բ. Ա Վ դ ա լ Ր Ե դ յ ա ն, նշվ. աշխ., էջ 58—65:

21 В. Миллер, Очерки армянской мифологии в связи с древнейшей культурой, т. I, М., 1876, стр. 75.

րից ավագը (հիշենք Զրադաշտի և Միհր-Ներսեսի որդիներին), իսկ Սասնա ծռերի երկրորդ սերնդի մեջ ավագը Վերդոն էր։ Չնայած Վերդոյի մասին որպես քրմապետի էպոսում ուղղակի վկայություններ չկան (ներառյալ նրա կերպարն ընդհանրապես աղճատված է կամ մթազնված՝ գտնվելով դուրսմղման վիճակում), բայց էպոսի պատումներից մի քանիսում նա ուղղակիորեն թագավոր է հորջորջվում²²։ Իսկ հայտնի է, որ դասակարգային հասարակության և պետության առաջացման ժամանակաշրջանում գոյություն ունեւր քրմապետի և արքայի ֆունկցիաների միակցություն (հայ իրականության մեջ այս երևույթը գոյատևում էր անդամ մ. թ. I դ.)²³։ Այս հանգամանքը դրդում է Վերդոյի Շաթան մականվան մեջ տեսնելու նրա սոցիալական վիճակի (որպես արքա-քրմապետի) և ոչ թե տիեզերական էության արտահայտությունը։

Աստվածաշնչից հայտնի է փղշտական թագավորների պեղազա-փղշտական ժագամբ Շաթան տիտղոսը, որը բուղար գիտնական Վ. Գեորգիևը բխցնում է հնդեվրոպական նախալեզվի k'er-, k'erə-, k'ra- («վերնամաս, գագաթ, գլուխ, եղջուր») արմատից՝ այն կապելով մի կողմից խեթերեն *harsan* «գլուխ», մյուս կողմից՝ հունարեն *κάρωνος* «գլխավոր, պետ» նույնածագում բառերի հետ²⁴։ Գ. Զահուկյանը սրանց է կցում նաև Հայաստանի թագավորներից մեկի՝ Կաբանի (*karan-ni*) անունը, որն, ըստ նրա, կարող էր լինել այն կրողի ոչ թե անձնանունը, այլ տիտղոսը²⁵։ Թվարկված տերմին-տիտղոսների հին հայկական զուգահեռն է ներկայացնելու Վերդոյի Շաթան մականուն-տիտղոսը՝ հետագայում նոր մեկնաբանում ստացած իր նախնական իմաստի մթազնման պատճառով²⁶։ Շաթան մականվան այսպիսի ստուգաբանության հավանականության օգտին է խոսում և այն, որ ժամանակին Սասունը մասն էր կազմում Արմե-Շուպրիա երկրի, իսկ սա Հայկական լեռնաշխարհի տարածքում հայերենակիր ցեղերի (հայերի լեզվական նախնիների) առաջին պետական կազմավորումներից մեկն էր։

Այսպիսով, Սասնա ծռերի երկրորդ սերնդի ներկայացուցիչները սոցիալական որոշակի ֆունկցիաներով օժտված տիեզերական էակների կերպարների բանահյուսական-էպոսային զարգացման արդյունք են։ Ընդ որում, նրանց կերպարներում տիեզերական գծերն առավել ցայտուն են դրսևորվում, քան Արտաշեսի կամ Զրադաշտի որդիների կերպարներում (այստեղ առաջին պլան է մղված սոցիալականը և մթազնված՝ տիեզերականը)։ Այսուհանդերձ, վերջիններիս նման Մհեր, Հովան, Վերդո եղբայրների կերպարները ևս պա-

²² «Սասնա ծռեր», հ. Բ, մասն Ա, Երևան, 1944, էջ 20, 65։

²³ К. В. Тревер, Очерки по истории культуры древней Армении, М.—Л., 1953, стр. 62—63.

²⁴ В. Георгиев, Исследования по сравнительно-историческому языкознанию, М., 1958, стр. 103.

²⁵ Г. Б. Джаякян, Хайасский язык и его отношение к индоевропейским языкам, Ереван, 1964, стр. 41—42.

²⁶ Այսպիսով, հնդեվրոպական կենտում տիպի լեզուներում ունենք միևնույն արմատից ծագած խեթերեն *harsan*, հունարեն *κάρωνος* բառերը և հայաստանի *karan-ni* տիտղոսը, իսկ ազգակից սատեմ տիպի լեզուներում՝ պեղազա-փղշտական *šaṭān* և հայերեն *šaṭān* տիտղոսները։ *K'erə-s-n > šaṭān* անցման համար հմմտ. *k'er-s- > ցոռիկ*, երբ հնդեվր. *k' > հայ. ց*, իսկ հնդեվր. *-rs- > հայ. -ռ-* անցումը ընդհանրական է (Г. Б. Джаякян, նշվ. աշխ., էջ 180)։

հեղինակը իրենց նախատիպերի սոցիալական ֆունկցիաների վերհուշերը։ Նրանցից առաջինի և երկրորդի մեջ հստակորեն երևում են զորավարն ու տնտես-հաղարարատը, իսկ երրորդի մեջ՝ շնայած աղոտ, այնուամենայնիվ, ուրվագծվում է նախքին արքա-քրմապետը։

Արտաշեսի երեք որդիների և սասունցի երեք եղբայրների մասին ասվածները թույլ են տալիս եզրակացնելու, որ հին Իրանի և Հնդկաստանի նման ինչևէ Հայաստանում ևս ժամանակին կիրառություն է ունեցել աստվածների եռանդամ դասակարգման սկզբունքը։ Ինչպես նշված երկրներում էր, հին Հայաստանում ևս այն լինելու էր հնդեվրոպական միասնության ժամանակաշրջանից եկող ժառանգություն՝ կապված հնդեվրոպական նախաժողովուրդ-ցեղախմբի մեջ ընդունված հասարակության եռադաս (քրմեր, զինվորներ, հողագործներ կամ շարքային համայնականներ) բաժանման հետ։

ТРИ БРАТА ИЗ ЭПОСА «ДАВИД САСУНСКИЙ» И ИХ ВИПАСАНКСКИЕ ПАРАЛЛЕЛИ

С. Г. ПЕТРОСЯН

Резюме

Второе поколение сасунских богатырей — братья Верго, Мгер и Ован в армянском эпосе наделены не только космическими, но и социальными функциями. Аналогичные образы можно найти в древнеармянском фольклоре (а именно, в випасанке). Это — трое легендарных сыновей царя Арташеса: Мажан, Артавазд и Вруйр.

Как доказано французским ученым Жоржем Дюмезилем, идеология трехчленной классификации богов лежит в основе религиозных верований всех индоевропейских народов, являясь наследием времен индоевропейской общности и отражая принцип трехчастного деления (жрецы, воины, земледельцы или рядовые общинники) протоиндоевропейского общества.

Сопоставление образов трех братьев из эпоса «Давид Сасунский» и трех легендарных сыновей царя Арташеса (Верго—Мажан, Мгер—Артавазд, Ован—Вруйр) приводит к заключению, что подобно древнему Ирану и древней Индии в Армении также был принят принцип трехчастного деления общества и вытекавшая из него трехчленная классификация богов. В недрах этой общеиндоевропейской идеологии и зарождались как прототипы образов трех сыновей Зороастры («первого жреца, первого воина, первого земледельца») из известной иранской легенды, так и прототипы образов трех сыновей царя Арташеса из випасанки и параллельных образов братьев-богатырей из эпоса «Давид Сасунский».